

30.oktober.2018

UKA2018/168

**Nunatta kujataani aalisarnermut nunamilu inuussutissarsiornikkut periarfissanik
tikkuaallunilu suussusersisussamik Naalakkersuisut UKA2019-imi
saqqummiunneqartussamik nassuiaasiornissaat pillugu Inatsisartuni aalajangiiffigisassatut
siunnersuut.**

(Inatsisartunut ilaasortaq Aqqaluaq B, Egede, Inuit Ataqtigiit)

Nunatta kujataani aalisarnermit, Nunamilu inuussutissarsiornermi tikkuussillunilu siunnersuussutissamik, Naalakkersuisunit UKA2019-mi saqqummiunneqartussamik nassuiaasiortoqarnissaa pillugu Inatsisartut aalajangiiffigisassatut siunnersuut, Inatsisartuni ilaasortamit Aqqaluaq B, Egede, Inuit Ataqtigiinneersumit saqqummiunneqartumut Siumumiit qujavugut, saqqummiunneqartorlu imatut oqaaseqarfigisavarput.

Aalisarnermut tunngasut:

Naluneqanngitsutut Naalakkersuinikkut ukiuni kingullerni annertuumik kujataa immikkut isigalugu suliniartoqartoq siumumiit ilisimagatsigu oqaatigisavarput, aallaat immikkut pisassiisarnert ingerlanneqartarlutik aammalu angallasersuinerit ineriartortinneqarlutik, tamakkuli uniffiginagit siuarsaneq ingerlaqqittariaqarpoq, tassami ulluni 365-ini aalisarsinnaaneq tamaginni anguniarneqartariaqarpoq taamaaliussagaannilu aalisakkat ukiup ingerlanerani takkullutillu qimaguttartut katiterlugit naleqqussarfigisariaqarput, aamma kujataani rejer-niarqilersinnaaneq misissuiffigalugulu aallartseqqinneqartariaqarpoq.

Inuussutissarsiornermut tunngasut:

Oqaaseq inuussutissarsiorneq immini imartoorujussuuvoq, Naalakkersuinikkullu kujaataata ineriartortinneqarnera arlalippassuartigut sulissutigineqarpoq, savaateqarneq umasuuteqarneq nunalerinerlu, ammeriveqarneq, takornariaqarneq, aatsitassarsiorneq, mittarfissuartaarniarneq, suliffissuarnik inerisaaniartunik tapersersuineq, aalisakkerivinnik inerisaaniartunik tapersersuinerit il.il.

Kujataata inuerukkiartorneranut tunngasut:

Siunnersuuteqartup tunngavilersornermini eqqaasaasa ilagaat Kujataata inuerukkaluttuinnarnera, tamannalu ajoraluartumik assortorneqarsinnaangilaq, Inuerukkiartornera sumik peqquteqarneris aamma misissuiffigineqartariaqarpoq, tassami Inuit sumi najugaqarumanertik namminneq kiffaanngissuseqarlutik pisinnaatitaaffigimassuk, tamanna aamma eqqaamaneqartariaqarmat, Siumumiilli ilmagaarput Naalakkersuinikkut suliniutigineqartut annertuut kujataanut aamma tunngasut eqqarsaatigalugit inuerukkiartorneq killup tungaanut saatikkumaaraat periarfissat takkussuutilersut tunngavigalugit.

Nunatsinni qangarsuaaniilli silap allanngorartuarnerata kingunerisaanik silaannaap immallu kissassusii aamma allanngorartuarput tamatumalu malitsigisaanik imarmiut kissartup aamma nillertup umasui aalisagaalu aamma nikerartuarput.

Nunattalu kujataa peqqarniitsumik avatangiiseqarpoq ukiakkut ukiukkullu anorersuit, upernaakkullu sikorsuit ilaatigut aasaq ilanngussinnaasarlugu, taamaatumik naleqquttunik atortulersunngikkaanni imminut akilersinnaasumik inuussutissasiuteqalernissaq ajornakusoorsinnaalluni, naleqquttunillu atortulersornissaq avaqqunneqarsinnaajunnaarpoq aamma naleqqussartuarnissaq.

Kujataanillu aalisarnikkut suliffissuaqarnikkut sulisoqarnikkullu allallu attuumassuteqarsinnaasut aamma tamaasa peqatigalugit ineriatoritseqqinnissaq piviusunngortitsiffiusumik Siumumiit Naalakkersuisunut kaammattuutigaarput,

Siornatigullu kukkusutaasartut iliutigalugit makkua suleqatigiinnissaat aamma kissaatitta ilagaat, avammut niernermik ilisimasallit, sulisartut suliamut atuumassutillit kiisalu aalisartut, piginneqatigiissinnaanerat ingerlatseqatigiiffinnik misissuiffigalugu aqutissiunneqartariaqarpoq, taamaaliornikkut Inuit amerlanerpaat piginneqataasinnaanerat oqartussaaqataasinnaanerat aammalu sunniuteqarsinnaanerat angoqqullugu.

Aqutsissiussiuartariaqarpugut aporfiusinnaasut anigorniartarlugit, taamatut oqaaseqarluta Inatsisartuni ilaasortap Aqqaluaq B, Egede-ip siunnersuutaata qulequtaa allanguuteqassagaluarpuunniit uniffiginagu suliassap suliarineqarnissaa innersuullugu, Siumumiit ataatsimiititalianut susassaqtunut ingerlateqqippagut ataatsimiititaliallu sulilluarnissaannik kissaallutigit.

Qujanarlu siunnersuut oqaaseqarfigisinnaagatsigu

Henrik Fleischer, Siumut